

- OUBLIYÉ LABSANS-OU -

Ankò an lot jou ka lèvé, kon mwen soley-la maléré.  
Kon mwen menm sé niyaj-la ka kitè laum-yo koulé.  
Sé konsi menm gran siel-la, konsi lanati tris pas ou alé.  
Tout santiman ka mélanjé é tout kò-mwen ka révolté.  
Pas man pé pa aksepté jan bagay-la ka roulé,  
Menm si nou two sav, ho wi, an jou nou tout pou pati.

Refrain :

Mé man sav kè an fon tjè-mwen, Wou é mwen sa pa fini  
Fok ou sav kè dan lespri-mwen, Nou ké ansanm pou toujou,  
Man kay oubliyé labsans-ou, tou long man ké risanti  
Tandres-la ki té dan zyé-w, dousè-a dan sourir-ou.

Kay ni anlo jou ké lèvé, soley-la kay pé oubliyé.  
Si nou sav andidan nou, ni lanprent-ou ki séré,  
Souvan sa ké red pou nou, pas sé tann viva-w nou sé lé.  
Tan fè tan, tan kitè tan é tan ka djéri tout blési.  
Sé sa tout moun toujou di pou apézé lé tourman.  
Mé pli tan-an ké pasé, sé pli fò nou key sonjé.

Pas nou sav kè an fon tjè-nou, Listwa-nou pé pa fini.  
Fok ou sav kè dan lespri-nou, Ou ké bò nou pou toujou,  
Nou kay oubliyé labsans-ou, Pou tou long nou risanti  
Tandres-la ki té dan zyé-w, dousè-a dan sourir-ou.

Nou pa sav si nou ni tan di'w konbien nou té enmen'w.  
Pa sav si nou bien fè tou sa nou té pou fè pou pwouvé'w sa.  
Nou sav kè la ou yé, ou ja ka véyé anlè nou.  
Lè nou ké bizwen'w, seten ou pé ké janmen bien lwen.

Oubliyé labsans-ou, Yenki pou sonjé prezans-ou... (x 2)

Refrain

Oubliyé labsans-ou, yenki pou sonjé prezans-ou...